

NIKO NE GARANTIRA SAVRŠENE IZBORE

- Vjerujemo da će uvjeti izbornog procesa biti dobri, kaže Moore
- Proces izbora u BiH još nije na demokratskoj razini kao u stabilnim demokratskim društvima, smatra Budimir

Sef misije OSCE-a u BiH Jonathan Moore sastao se jučer sa direktorom Državne agencije za istrage i zaštitu (SIPA) Goranom Zupcem, koji ga je informirao o daljnim pravcima djelovanja ove institucije, te o tome "kako SIPA svakim danom postaje sve ozbiljnija agencija".

Manje priče

"Mi ćemo u budućnosti sve manje pričati, a sve će više o nama govoriti naši rezultati. SIPA će i dalje nastaviti radovati građane dobrim aktivnostima i operativnim akcijama i bit će siguran i pouzdan partner operativne policijske saradnje zemalja u regionu", kazao je Zubac.

Kada je riječ o sigurnosti predstojećih izbora, Zubac je izrazio uvjerenje kako će oni proteći u "jednom bezbjednom okruženju, koje će omogućiti demokratsko izjašnjavanje svih građana BiH". Moore je podsjetio na važnost da SIPA kao i sve druge državne agencije rade bez političkog pritiska, posebno tokom izborne kampanje. Nažalost, politički pritisci, naglasio je Moore, ne predstavljaju problem samo prije izbora, već i nakon njih.

"Mora postojati visok nivo profesionalizma u svim državnim agencijama, ali i na svim nivoima BiH. Činjenica je da postoji politički pritisak, ali ne samo u ovoj zemlji, on je prisutan i u drugim zemljama i zadatak misije OSCE-a je to spriječiti. Ja i direktor Zubac detaljno smo razgovarali o sigurnosnoj situaciji uoči izbora. U OSCE-u ne vjerujemo da postoji neka prijetnja ili rizik, već naprotiv, vjerujemo da će uslovi izbornog procesa biti dobri, te da će građani ove zemlje izaći i dati svoj glas 12. oktobra", zaključio je Moore, koji je jučer razgovarao i sa predsjednikom FBiH Živkom Budimirom,



Moore i Zubac: Spriječiti političke pritiske



Sa predsjednikom Federacije: Promjene ovise od građana

o izborima, ali i poplavama koje su nekoliko puta ove godine pogodile BiH, obrazovnom procesu i drugim temama. Budimir je izrazio zadovoljstvo što je Moore ponovo u našoj zemlji, pogotovo "u ovom osjetljivom trenutku za BiH".

"Proces izbora u BiH još nije na onoj demokratskoj razini kakav je u stabilnim demokratskim društvima i zbog toga nam je još asistencija svih međunarodnih subjekata itekako značajna, posebno OSCE-a koji je od prvih poslijeratnih izbora prisutan u BiH", kazao je Budimir.

Apatija i promjene

Da li će nakon izbora biti značajnijih promjena, Moore je ocijenio kako to prije svega ovisi od samih birača, te će ako građani izađu na izbore i šanse za promjene biti veće.

"Ako bude postojala apatija i ako

građani ne budu željeli učestvovati na izborima, šanse za promjene u ovoj zemlji bit će male. Teško je biti uvjeren da su svi uvjeti za izbore savršeni. Iz tog razloga obavezno je da Centralna izborna komisija BiH radi svoj posao, uz podršku posmatrača. U BiH je već prisutna odvojena misija posmatrača OSCE-a pod pokroviteljstvom Ureda za demokratske institucije i ljudska prava koji ima sjedište u Varšavi. Snjima će biti više od 300 međunarodnih posmatrača. Tokom izbora radit će i drugi domaći posmatrači, zahvaljujući raznim organizacijama te raznim ambasadama i njima će biti oko 3.000. Da li će sve na izborima biti savršeno niko ne može garantovati, ali sa podrškom i pomoći svih nadamo se da će uslovi za glasanje biti najbolji mogući" poručio je Moore.

A. GRABOVAC